

小方壺齋

小方壺齋

途中記

景東程含章著

蓋聞抱管窺之見者不足與觀日月之明守測蠡之知者不足與論江海之大夫天下大矣其間都邑之盛物產之饒風俗之異古今人物之美士大夫卽不親履其地猶將得而言之然而古語云百聞不如一見也昔太史公序列古之仁聖賢人而遊歷遍天下嘗自言西至崆峒北過涿鹿東漸於海南浮江淮矣至長老皆各往往稱黃帝堯舜之處風教固殊焉然則觸壯遊之素志發思古之幽情固有難以自己者矣余於戊寅八月朔自羊城買舟北上過飛來寺賞其境致幽勝頗堪避暑寺豈能飛者哉其誕妄吾不信也中秋前一日度嶺拜張文獻公祠余舊有詩云嶺表鄉賢推第一開元國士更無雙不可移易也讀公千秋金鑑錄其大學衍義之祖歟嶺以北屬江西江西一大都會也民情健訟與廣東大畧相同而趨利殆又過之至南安放舟直下過贛州乃王陽明先生剿平山賊處先生理學遺格物而空致良知混入禪宗非聖門下學上達之旨然其經濟才華實堪欽仰非空談性命者比也下十八灘日熱如火汗出如湯過吉安府爲歐陽永叔曾子固文文山三先生故里豈其山川獨秀歟何廬陵之多賢也昔宸濠反太守伍文定佐陽明討平之出必冠軍謀出萬全厥功甚偉過豐城縣乃張華雷煥得干將莫邪處張茂先望氣知寶亦異人也當是時朝綱大紊內變外侮相繼而至吾不知其得劍後能斬一奸邪平一禍亂否然則寶劍亦何益人間事耶至南昌府阻風泊滕王閣下每念高人徐孺子循吏韋丹令人有增重山河之感江西非拙於文者不當更以子安文字標新表異長其浮華也已復解纜望廬山觀瀑布與懷陶淵明周濂溪諸前輩過鄱陽湖問明太祖大戰陳友諒與王陽明擒宸濠處舟人猶有能言之者至廣信府遊信陽書院江天漠漠煙水蒼茫亦勝概哉由玉山縣乘肩輿至常山縣下船夫江西浙江皆人文藪也而浙江民俗勝江西焉經衢州金華嚴州三府爲浙東上游過嚴子陵釣臺誦范文正公祠堂記雲山江

水令人穆然神遠矣至錢塘江看海潮問元人屯兵處杭州山水甲天下其勝概尤在西湖白蘇二公與

錢越王之祠廟猶在也而岳忠武王于忠肅公之墓巍然並存岳臺有鐵鑄秦檜夫婦像跪啗下徐氏題曰青山有幸埋忠骨白鐵無辜鑄佞臣王

陽明題于墓曰赤手挽銀河君自大名垂宇宙青山有幸埋忠骨我來何處哭英雄憑弔甚多咸推二聯爲佳且夫天下盛推華嚴之地必曰江浙江浙之美在蘇

松常鎮杭嘉湖紹八府八府之廣不過五六百里耳而其間財賦之盛人才之多天下莫能及其故何哉

蓋東南山水源於雲貴四川經湖廣江西至江浙而蠡豪之氣始盡譬之花果其精華結聚乃在樹杪也

重陽日至蘇州世家巨族富商大賈多出其中然而風氣亦漸薄矣其農田水利江湖堤障大都皆前明

周文襄公與况太守所定○本朝湯文正公遺愛在民至今吳人猶思之泊胥門傷子胥之忠而又惜其

不去也此地爲徐中山平張士誠處圍之久而克之難亦已甚矣城下之日不妄殺人位冠軍臣聲施後

世宜哉渡揚子江暑氣漸退問韓蘄王水戰處望金焦二山飄飄然若方丈瀛洲之在海中也至揚州歌

陽公之餘韻猶在富商大賈奢侈無度然數年來頻傷於水民亦困矣因問史閣部死節處天既訖汝明

命燭火之餘能與日月爭光哉過淮安惜淮陰侯功蓋天下而有取死之道三不克善保其終也然漢家

之待功臣其薄如此一傳而子孫誅夷社稷幾滅非無故矣淮海徐揚水高於地百姓凜凜以堤爲命○

國家歲費百萬金以防之司事者能毋以心肝奉○○至尊哉至清江浦觀河工問古今來治河良策始

悔余前作理財書北岸開河之說爲失計也事不思其終始而輕議更張可乎哉遂渡河由王家營登車

過挂劍臺思延陵季子之賢後人不當以讓國釀亂責之也從此出江南入山東山東聖人生長之地也

昔之人文首推鄒魯今則不如江浙矣而儉樸猶未改也至嶧縣爲古偃陽城卽春秋所書甲午遂滅偃

陽是也過滕縣有滕文公行井田處井田封建相爲表裏在三代以前則爲良法而在後世則爲亂階頗

怪拘儒不通世事妄謂古制宜復固哉至鄒縣謁孟子廟槐柏蒼古皆宋元時所植竊嘆孟子以王佐之

才不逢文武成康之君而僅以七篇傳也然向無孟子誰識王霸之辨仁義之歸哉韓昌黎稱其功不在禹下當矣過泗水橋望孔子林廟僅三十里耳高山仰止景行行止雖不能至心嚮往之過兗州經柳下惠墓三復直道事人數言確乎不拔非聖人而能若是乎宜孟子稱爲百世之師也過汶上縣乃孔子爲中都宰處聖人之流風餘澤至今猶有存者至東平州過冉伯子祠斯人斯疾今古同傷然德侔顏閔名列四科亦復何憾孟子曰天壽不二修身以俟之顏冉之謂矣經三歸臺遺趾因論管子天下才也一匡九合之功赫赫照人耳目身死之後齊國大亂蘇子瞻責其不能薦賢非苛也過東阿經西楚霸王墓歎王之輔佐非人而驅韓彭張陳以歸於漢也山東爲仕宦福地今則訟牘繁多民以告官爲能事司牧者其有缺歟燕齊之間女樂盛行年未及笄而戛鳴瑟飭形容紆長袖目挑心搖以趨行旅之門絕不知人世間有羞恥事彼豈眞生無羞惡之良而與齊民異性哉惡俗不以淫蕩爲可恥而以貧窶爲可羞相習成風伊於胡底嗚呼孰與迴狂瀾於既倒乎直隸古燕趙地也吾聞燕趙多感慨悲歌之士今過其境而農安耕鑿士習詩書其忠孝節義文章往往爲天下最視向之屠狗狂歌者何如哉蓋○國家漸仁摩義之化之入人深也久矣過河間府爲漢儒董子故里當秦火之後而能首發天人陰陽之理正誼明道之旨功豈在退之下哉使得聖人而師之曾閔之流亞也過涿州爲黃帝擒蚩尤處作孽者庸有幸乎過寶店爲竇燕山故里作善降祥天道之必然無可疑者大抵畿輔差事絡繹官以辦差爲賢能民事其緩焉者也過蘆溝橋進彰義門卽○京師也京城周四十里包以外城○○天子宅中而治而王侯第宅與公卿大夫百執事之人環而衛之綱紀修明府庫充實文經武緯之士穀擊肩摩萬國來同商貨雲集其君子承○○天休而不驕不泰其小人順○○帝則而不識不知大哉○○皇都古莫與京矣維時天氣嚴寒盆水結冰謹齋戒沐浴於十月二十四日早朝○乾清宮瞻仰○○聖容渥承○○恩旨退而思之○

○皇上以神聖文武之德致時雍風動之治二十餘年矣普天之下率土之濱物靡不得其所乃猶○
盱眙宵衣勤求治理況我中外臣工敢不夙夜靖恭以襄○雅化哉十一月朔九日出京瑞雪霏微冰猶
未壯由山東荏平縣改道東昌乃東海高士魯仲連一矢下聊城處過朝城縣入河南河南當天下之中
無深山大澤以間之論其疆域小於山東而衍沃過之風氣亦較醇焉由姜家樓渡河水勢寬平視淮徐
之間險夷異矣然患生於微而禍成於忽能毋慎歟至朱仙鎮卽宋岳少保大敗金將兀朮兵奉金牌十
二促令班師處也陳留洧山本屬鄭地采蘭贈芍之風而今亡矣過許州令人思鄭寤生曹孟德兩人奸
詐若出一人也經汝墳河條條肆獮有存焉自潁汝東南盡海皆戰國時楚地論楚之土地兵甲五倍
於秦而卒見滅於秦者黃鐘毀棄瓦缶雷鳴也過葉縣或傳子路問津葉公問政皆在於此過舊縣卽古
昆陽城觀光武大破王莽兵百萬斬其大將王尋處知帝王之興自有天命衆寡非所論矣過博望乃孔
明火燒曹兵處孔明一生用兵多用火攻孫武子之遺教也過南陽府諸葛草廬猶在竊歎孔明以蓋世
奇才竟不克興復漢室還於舊都天耶人耶迄今讀出師二表千古純臣之心雲漢維章矣若夫湖廣本
因洞庭湖得名以其地大物博故分南北二省焉其北省始樊城至此下船入漢隔岸爲襄陽府乃中原
扼要之地詩人杜甫孟浩然米芾等皆出於此城外峴山羊叔子之墮淚碑依然無恙也順流過安陸府
土沃民殷視河南諸郡復乎遠矣至漢口入長江泊大別山下謁禹王宮大哉禹功明德遠矣武昌漢陽
兩府夾江而城黃鶴樓晴川閣對峙入雲上通川蜀下達江淮荆楚一大都會也入煙數百里商賈雲集
舳艫千艘幸民知畏官吏治猶易云溯江而上過赤壁觀周郎縱火燒曹兵八十萬處而蘇子瞻賦赤壁
乃在黃岡特假借之詞耳前人辯之詳矣其南省始臨湘縣過岳陽樓咏杜子美孟襄陽二詩氣象涵蓋
古今宜詩人爲之閣筆余尤愛范文正公先憂後樂之言將聖賢心跡事功昭然抉出又非杜孟詩人所

可同日語也。泊洞庭湖水已消落，焚香再拜洞庭君，夜聽湘靈鼓瑟，畫觀岳少保破滅水賊楊么處，真古今第一名將哉。至長沙，泊嶽麓山，誦禹王岫嶸碑至湘潭，乃楚三閭大夫屈子沈淵處，酌酒爲文以弔之。而以賈大夫配，既又取太史公屈賈列傳，朗誦一遍，悲風四起，雲霧晦冥，雪點錚錚，打入船艙，疑一大夫有靈而與余舟相送也。至衡山縣，謁南嶽，余此行取道瀟湘，爲瞻仰衡山來耳。時值陰雲密布，雨雪連綿，自憤此生無福，乃虔心默禱，蒙神降鑒，賜以一日晴明，既觀山容，復拜神象。我○國家典禮之隆○○○祖○○○宗○○○今上文藻之大，無不備觀，因作記一篇以紀其事。昔韓文公能開衡山之雲，古今信之余。本凡陋，安敢上比古人。然昔者禱於泰山而雲開，今者禱於衡山而雲亦開，或者十數年來爲○國爲民之心未敢少懈，兩山之神謂是孺子可教，姑以俟其將來，故不拒其一見之請耶。今後惟當愈切忠義之懷，倍存正直之氣，以期無負神明耳。遂溯衡州府入郴江，過耒陽縣，山多產煤，船如蜂蟻，過永興縣，奇山怪石紛不可名，遂由郴州度嶺，至宜章縣，度歲而湖廣之地始盡。云買舟而下，過平石入粵東，船小如葉，溪窄如溝，水急如箭，九瀧十八灘，絡繹澗谷間，怒濤飛流，響入雲際，怪石崢嶸，一望如十萬蛟蛇，張口磨牙，欲以余舟爲美肉，思得而飽啖焉。舟人左趨右避，儼若無事，神乎技矣。瀧頭有韓文公祠，并祀伏波將軍，蓋九瀧之險，甚於川江，必有妖物憑乎其間，非二公之神不足以鎮之也。酌酒焚香三拜之，仰視雲天，纔若匹練耳。因思昌黎經過其地，非必有深仁厚澤以及民也，而後人重其名祠而祀之，往來行人無貴賤賢愚，罔敢不祀其祀也。罔敢不虔鳴呼，可以觀德矣。出樂昌縣，天始晴霽，過韶州於己卯人日，回至羊城，而天氣漸暖矣。總而論之，江南之利多，秬稻河北之利多，秬麥濱海之利多，魚鹽近山之利多，牛羊齊梁之利多，黎棗辰沅之利多，竹木鄂岳之利多，布縷蘇杭之利多，蠶絲嶺表之利多，果糖豫章之利多，漆梟幽燕之利多，皮革兩河之利多，酒漿此其大較也。變而通之，化而裁之，擇其精者以輸於○京師而

財用足矣廣東之民華而泰其失也侈江西之民稠而聰其失也濇浙江之民明而辨其失也史江蘇之民文而巧其失也靡山東之民戀而直其失也嘒直隸之民強而義其失也徧河南之民質而愿其失也緩湖廣之民信而毅其失也傲若夫泰而不侈聰而不濇辨而不史巧而不靡直而不嘒義而不徧愿而不緩毅而不傲則莫不論秀書升貢於○京師以待○天子之官使焉要之矯其偏啟其蔽抑其太過引其不及皆醇民也而吏治於是可睹矣今○聖天子黜貪儆惰選賢建能諄諄以化民成俗望天下封疆之臣咸懷忠良章學未通方論古無識然往還萬七千餘里目覩歲豐民樂熙熙唐虞之世也援筆以志

同治六年秋家君守瓊州七年春余應禮部試報罷七月既得捻匪肅清之信遂乞假送親八月壬申同惠元弟奉家母發○京師上船於通州曹劍湖妹聲以其姊嫂及吾妹還揚州遂偕甲戌去通州九月丙子次天津頤堂叔來別遂循潞入運丁亥至德州甲午次臨清州以開河水涸舟不通止行劍湖與鏡橋兄如東昌見陶贊臣刺史假臨清志讀十月乙巳劍湖自東昌以車迂何星垣先行丁未登陸大風止梁家淺戊申次東昌己酉登光嶽樓庚戌微雪辛亥陸行至李連橋登舟李連橋者黃河支流也距張秋鎮近以兵差故船避於是鏡橋先在焉明日遂行丙辰夜寒甚多流冰戊午出沈家口至蔣家莊水淺甚己未易小舸至十里鋪庚申宿戴家廟戴廟東阿周鄴仙故侯殉節處詩以弔之辛酉出黃入運水溜甚激泊安山閘癸亥至南旺下閘復乘原舟甲子過分水龍王廟登來汶樓乙丑至濟甯假楊總戎礮舟送渡湖丁卯登太白樓訪古南池己巳出湖辛未至韓莊十一月丁丑至楊莊余如清江浦浦上新築城戊寅如西壩見煥章兄辛巳至淮安過古枚里泊淮西門丙戌至揚州以天寒止行居南河下癸卯余如鎮江十二月丙午下鄉埭歷代先人墓己酉如金陵戊午回揚州八年正月朔癸酉在揚州二月甲辰登舟丁未去揚州三伯送於河干宿瓜洲戊申阻風己酉假紅船濟大江過焦山風利不得泊晚宿丹陽辛亥至無錫壬子風雨駕小艇遊惠泉山品第二泉沽酒歸舟飲甲寅至蘇州丙辰遊山塘虎邱辛酉至杭州止七叔寓齋見六叔幹廷叔與諸昆弟晤癸亥登吳山乙丑遊西湖登湖心亭謁岳王祠登孤山放鶴亭飲林公祠林公祠者署錢塘尉閩人林汝霖殉粵匪之難藁葬孤山邑人祠祀之故名丁卯再遊西湖仍飲林公祠循湖潯謁蘇白二公祠己巳遊金雅莊花木繁盛池水尤活癸酉詣天竺山飯靈隱寺眺飛來峰登冷泉亭觀一綫天三月丙子去杭州以仲華弟行劍湖送於江潯別余北歸丁丑至富陽謁孫弟來兄

戊寅己卯風雨山水陡漲逆濤至桐廬辛巳入七里瀧過嚴子陵釣臺至嚴州乙酉至衢州丁亥次常山
己丑度嶺至玉山壬辰至廣信癸巳至河口鎮易船己亥至瑞洪四月朔癸卯出彭蠡湖中流風作止於
湖汊詰朝始渡乙巳至南昌丙午遊百花洲有亭數座水繞四圍桃柳森列荷葉田田謁張江三公祠三
公者張文節芾江忠毅忠源江壯恪忠義以守南昌破粵寇功故祠祀之戊申至豐城江水漲舟子泅水
引纜行癸丑至峽江城門沒於水行人跨城往還乙卯至吉水余小疾丁丑愈戊午泊萬安庚申辛酉壬
戌過九瀧十八灘甲子次贛州得家君守廣州信辛未至南安五月朔壬申雨癸酉上大庾嶺晚至南雄
丙子至韶州戊寅過潯江峽庚辰至滑遠辛巳至三水壬午次佛山癸未至廣州自○京師至廣州驛道
出皖江江右七千五百七十里出蘇杭衢信七千七百二十里自通州至天津曰潞河自天津至楊莊曰
運河由漳衛濟汶以達於湖自楊莊至揚州曰淮河以達於江自丹陽至杭皆渠河水無洪流自杭州至
常山曰嚴江卽古所謂富春江自常山至玉山八十里陸道曰玉山嶺自玉山至瑞洪曰溪河以達於彭
蠡湖出湖至南昌乃江湖交匯處自南昌至南安曰漳江自南安至南雄一百二十里陸道曰大庾嶺自
南雄至廣州曰潯江出韶州曰韶江今廣州之人又曰北江

同治九年冬十月家君既謝廣州己酉余偕龔仲堅發自廣州泊花埭遊翠林園大通寺煙雨井煙雨樓
往杏林莊登藏春樓庚戌至佛山壬子至三水乙卯至清遠丁巳過峽江遊飛來寺飛泉亭帶玉堂晚大
風山水爭鳴駭人心耳庚申過滇陽峽壬戌過觀音巖閏十月丁卯至韶州過風度樓風采樓戊辰泊津
頭謁盧太傅祠祠祀唐節度使光綸辛未至始興江口水淺甚甲戌改陸至南雄州乙亥登古太平橋望
月丙子過山謁張文獻公祠登補青亭至南安己卯去南安癸未至贛州甲申下白澗灘鼉灘至天砭灘
舟觸石隙水敗宿高坑勝廟丙戌使人至贛州買舟來卽行下天往灘大烏洲九腳灘天子地石人壩攸
鎮錫洲銅盤宿良口丁亥下涼灘黃金洲五座灘匡風灘武索小溜灘大溜灘綿繩閣惶恐灘至萬安縣
九瀧十八灘以天砭九腳匡風等處爲最險文信國詩云惶恐灘前說惶恐信然庚寅至吉安十一月朔
壬辰日長至至峽江癸巳雪甲午至樟樹鎮遠山多積雪乙未余疾丙申至南昌疾又加丁酉移客館召
醫察脈吳筠軒繆芷庭觀察潘梅溪小溪先後來視庚戌疾漸瘳壬子去南昌癸丑至建昌疾又作甲寅
輿中觀廬山瀑布丁巳至九江宿洋樓己未登氣拉渡輪船至湖口易山西輪船庚申大霧晚至大同夜
行辛巳晨過金陵午至鎮江易舟晚泊瓜洲壬戌次揚州假館於劍湖以醫疾明日仲堅別余歸大橋十
二月辛巳疾愈居丁家灣十年春正月朔壬辰余在揚州二月癸酉如鎮江丙子遊焦山宿松寥閣京口
三山夙擅形勝兵燹後焦山獨完風景流連三日乃去三月癸巳家君還揚州四月丙寅北行與劍湖龔
鑄九陳椿伯偕丁卯至邵伯毛墨昀偕己巳過淮陰釣臺次清江浦以耀堂弟行庚午如西壩尋煥章兄
不遇辛未至王營買車詰朝遂行丙子過沂州沂州北門外有石碑三一曰漢諸葛武侯故里一曰晉孝
子王祥故里一曰晉右軍將軍王羲之故里丁丑入山己卯宿羊流店謁羊叔子祠庚辰至泰安遊玉皇

閣上泰山天門孔子登臨處謁斗母宮王母祠入南門瞻嶽廟秦松漢柏巋然猶存辛巳過二疏故里壬午至開山毛子入都龔陳至陵別余先行是日次濟南見岳丈主於錢笠湖內弟甲申余小疾飲藥丁亥愈已丑遊大明湖謁鐵公祠南山葱翠可愛飲古厯亭五月癸巳再遊大明湖仍飲古厯亭荷花半吐菱葦參差追念舊遊如昨日事戊戌去濟南躍堂留濟上是日齊河渡黃雨後滑澁甚己亥過平原君相士處庚子次陵與星橋兄樹人弟晤觀顏魯公東方畫贊碑壬寅謁顏魯公祠賦詩泐石癸卯訪看花臺平原君墓甲辰去陵至德州見蝗晚日食丙午至河間丁未過任邱度十二連橋宿雄縣戊申至固安己酉渡永定河雨雹庚戌至○京師廣州在○京師東南去○京師遠由廣州至南雄度大庾嶺而北至南昌今與昔同由南昌取陸道至九江由九江登輪舟泝長江至鎮江今與昔異由鎮江揚州至清江浦今與昔同由清江浦至王營取山道至濟南陵縣而達於○京師今與昔又異

入廣記

湘潭王闓運著

自渡揭嶺日遠故園下灘乘瀧並值冬涸川石露列溪流清弱瀧船柔脆篙師猶拙自平石至樂昌乃昔遷客啼泣驚怖之地凡有六瀧酈道元所謂崖壁千空交柯晦景者也瀧源由潯入涯漢桂陽太守周昕疏鑿巨石始通舟楫舊有祠祀斯今爲祠禱韓愈素湍激雪風濤凜厲估舟驚望歎若天塹然觀其水勢淺陟殊甚徒極崩奔之狀實無浩洶之奇吾舟下瀧時觸破來舫移岸遷貨纖毫得濟非有江湖稽天之浸風濤呼吸之危也而衆人矜惜衣裝懼於濡沒重載輕發自取破碎清水白石遂受惡名耳口相傳自爲眩惑致使衣帶之水與呂梁齊險禱求謫臣而使君廢祀以愈生時猶不自濟欲其爲福不亦難乎由樂昌下大舟東至曲江五嶺之口也縣以曲江而名江紅聲同因改字矣設府建關控引吳楚浮橋橫江以權舟稅大編巨艦駢闐於此韶石在其北酈生所記二仙分憩之處也自唐以前傳虞舜奏樂於此及英德亦有堯山道元引耆舊之言云堯行宮王韶之記亦謂堯故亭又曰父老相傳南巡登此然則禹迹以前斯爲內地且金銀輪王治四天下唐虞二聖豈局步於五嶺乎以英德至今清遠經歷三峽卽瀘陽大庾中宿也大庾分二峽之間趙佗築萬人城楊僕伐破尋陋亦此岸地然是陸路之要區也江行之奇則在瀘陽道元云兩崖傑秀壁立虧天張子壽亦言晴晝山陰先秋水冷後人始開棧道建峽山寺於上懸崖長歎江帆蕭瑟雖詞客尋玩淹留忘俗而旁山剝落翠秀靡依以吾臥觀未爲佳勝也且南州炎德草木恆青藻麗山川宜增幽暎而石壁竦仄勢若火燎丹皮赭骨寸莖不附孰如蒸湘巖樹葱蘢松竹櫟柏陵冬鮮碧故過嶺以南無可瞻悅但此峽擅名既久未躋絕壁江山嘉會步步異形若登臨俯觀或當有異故周夔云碧瀾之下寸寸秋色乳枝磬落松風瑟瑟得此石室題爲到難矣吳都賦以閬風楫師習御長風今老龍河西等船實爲蹇陋舟行彭亨水手蠡疏每下篙竹喧呼叫跳足若蹶踣號聲慘冽清

日黃昏聞者駭悸兼劫盜肆出人人自危下至三江乃稍稍清曠三水今縣漢地志所謂滙水南至四會之地也滙水自清遠來曰潯江牂牁水源流萬里自肇慶來曰西江晉康水自廣甯來曰綏江均會崑都故爲縣號綏江至縣復分二派同爲一川故昔言四會矣冬水涸盡舟楫無利始以季冬六日至於廣州此州實四宅之南交荊州之下徼自漢迄今縣富有名往在他方聞彼土人說其物產矜炫殊絕云甲天下及躬覽風物考之圖志要其土俗可得言焉州爲秦南海郡地山海經所謂實禺郭景純云今番禺也姚文式言城東南偏有水枕陵此縣人名之爲番城倚其上在番山之隅也城始築自越人公孫隅號曰南武楚威王時有五羊銜穀穗之瑞乃增築楚庭周十里號五羊城及任囂趙佗始成都會吳步騭又廓番山之北及宋築子城甕城又增兩翅以衛居民明永嘉侯朱亮祖始連三城爲一卽今省城制也市廛逼窄第宅堅陝街衢垢穢無潔清之容民言侏僂貪利好奢自外國別爲風氣地性蒸暖易生疾疫蚊蠅乘其昏運蛇鼠充其毒食瘴厲風淫尤多盲女昔人言之詳矣島夷羅縵詭服殊形刀劍火槍縱橫於路民無正業習爲博盜白晝攫金露刃連隊不知其非法也俗取周興嗣千文列字八十分爲一章四分取一任人射覆凡出三錢之資償以十金國人若狂夢想顛倒號曰白鵠票斂財之巧術也意錢擲骰割肉懸壺藏鉤擲牌皆供賭輸愚者傾家智者疲神古博徒所未聞也凡倡女冶容多樂隨蔽獨此邦中視同商賈或連房比屋如諸生齋舍之制或聯舟竝舫做水師行營之法卷髮高尾白足著屐燕脂塗頰上連雙眉當門坐笑任客擇視家以千計人以萬數弦唱振聲盡發鳩音遠遊之人窺窬之性入於其間若抱虎狼斯實男女之一厄乎異物怪產來自番舶土人所甘良亦奇詭菜必生辛羹必稠甜若夫檳榔酸澀蕉子甘爛諸重十斤芥高七尺君遷小柿新會大橙不含霜雪多復皺腐醃橄欖以鹽鼓取蟻糞爲奇南榕樹不可蠟木棉不可絮奇器巧制則故賤其值水火菽粟則盡昂其價陸生所記南越之境五穀無

味百花不香者信非他方之所取也冬至初過桃榮棣落餘花生紅多不辨名但見其質了無其姿亦何
取於長春乎邦人市海鮮別爲厨館則有沙魚之翅海蛇之皮章舉馬甲鱖鯪天蠓蠃龍蝦雄鴨臘鷄
腥穢於市井紛錯於樓館者不可勝計又俗好燒炙物喜生割操刃持父千百其徒乞人待肉食而殮資
筵以多殺爲豪婚禮燒猪輒列數百俗無羞恥取婦以得女爲奇牀第之私守宮之驗明告六親誇以爲
榮知禮之家亦復隨俗亦既覲止我心則降此尤可笑歎者也通商之夷何止百種蟠據城府傲兀大官
屈心事之惟恐不歡況敢設備豫乎外郡土客讎殺未已且不受官勸誰能用武鄉村族居多建礮臺縣
官催科動必發兵幸而戰勝懼而納稅省中錄囚日屠百人皆無辜之窮老受錢而代死子賣其父如犬
羊然輕命者貨三綱絕矣朝富則爲大豪夕貧則充盜魁昔南漢劉鋹奢僭自雄樂裸逐之戲制燒煮之
刑今久漸○○皇風猶爲惡俗若非猛厲廉正貴士賤商先教禮讓後禁姦盜則伊川之野不百年而爲
戎乎尉佗文理以止鬪陳祖奮武而勸王彼何人哉彼何人哉

粵遊小志

江都張心泰著

粵東氣候與吾鄉迥異西省近湖南者稍稍同焉西省興安多風按地勢由湖南之興安上數百灘由興安之梧州下數百灘志乘稱桂林視長沙番禺在千丈之上高而多風理固然也風起時拔木飛瓦晝夜不息諺云興安風是也東省瀕海亦多風正二三四月發者爲颶五六七八九月發者爲飈字書無颶字土俗卽台音而加風字耳颶甚於颶而颶急於颶習海道者設爲占候法或按節序或辨雲物舟行大洋颶可支颶不可支蓋颶散而颶聚也而氣候之寒暖則視雨爲率靈川苦淫雨自春徂冬十僅一霽雖酷暑雨後亦寒眞所謂四時是夏一雨成冬矣東省廣惠潮秋冬少雨春夏亦霖雨不止故多潮溼溼重多生白蟻凡物皆食雖金銀至堅亦食凡金銀被食收白蟻煎之可復爲金銀金銀之性不變也性不變故質亦不變亦奇矣志稱嶺南屋柱多爲蟲蠹入夜則齧聲刮通宵攪人眠書籍蟬蛀尤甚故其地無百年之室無五十年之書詢不誣也兩粵惟桂林歲歲尙得雪若東省則多不知雪爲何物志稱雪至嚴關輒止大盛則度桂林城下不復南矣故草木至冬不凋甚有茂盛如吾鄉春夏光景五穀無味百花不香以其氣泄而鮮專凝至有花無香榮無味之諺且其花木多不應候而生梨花帶雨當在春時粵東八九月始開按唐武后時九月出梨花一枝羣以爲異粵則不爲異也舉一可概其餘廣州以荔支龍眼爲果歲夏至日賈人以板箱載荔支而北曰果箱荔支大熟曰果日洛陽以牡丹爲花歲二月十五日牡丹盛開曰花朝果日花朝可稱絕對西省南太迺等府東省海南均多瘴又氣候之變者有青草黃梅諸名目受之至重者有冷瘴熱瘴瘴之分余隨宦之所幸非煙瘴之區聞友人至泗城來者云鼻間忽聞有香氣卽瘴也人至午時始敢出行受瘴者十八九不生誠可畏也

象郡城東三里有七星山虞衡志云七峰位置如北斗者也下有巖洞七榜曰七星巖遊巖者必土人導